



Conde

M²³

16534

Complet

PRESENTATION

DES LETTRES

DE PROVISION DV

Gouvernement de Guyenne,

octroyé par le Roy à

monfieur le

Prince.



A PARIS,

Par MAMERT PATISSON Imprimeur
ordinaire du Roy.

M. D. XCVII.

Avec privilege.

Case

F

39

.326

1597 do

THE NEWBERRY
LIBRARY



APRES QUE LECTV-
RE A ESTE' FAICTE EN
Parlement le lundy 17. Mars 1597.
l'audience tenant, des lettres de prouision
du Gouuernement de Guyenne, octroyé
par le Roy à monsieur le Prince,

LOYS DOLLE' a dict,

MESSIEURS, Ceux qui sont
honnorez des principaux offi-
ces & plus importantes char-
ges de cest Estat, sont desireux
de paroistre en ce grād theatre,
à fin que publians la noblesse de leurs mai-
sons, & les seruices qu'ils ont faicts, on puisse
congnoistre qu'ils ont bien merité le iuge-
ment du Roy, qui a couronné leur vertu.
Il n'est pas necessaire à monsieur le Prince
d'y venir pour ce sujet: Car son extraction
est trop illustre, pour auoir besoin de ceste
monstre: & sa vertu, qui est encore en fleur,

A ij

ne se peut vanter d'auoir produit de si beaux fruits. Mais il a desiré ce iour, pour faire voir à tous la singuliere affectiō que luy porte le Roy, lequel ayant veu que sa vertu deuäçoit les saisons de la nature, a voulu preuenir son âge, en l'honorant du Gouuernement de Guyenne, qui est l'un des plus beaux & plus grans de ce Royaume, & qui est grädement accru par le merite de son dernier possesseur. Les poëtes veritablemēt ont bōne grace, quand sous le voile des fables ils cachent les plus beaux secrets de leurs obseruations. Ils disent que les enfans des Dieux ne croissent point par les reuolutions de plusieurs années, comme les hommes mortels : mais que dès leur naissance ils touchēt le sommet de leur perfection. Ils ont voulu figurer l'excellence du naturel des Princes (qu'ils nomment les nourriçons des Dieux) qui sont guidez d'un Ange si puissant, qu'en leur enfance il n'y a rien de foible, ny de petit : mais font voir dès leurs premiers ans, qu'ils sont engendrez Capitaines & destinez à commander. Ainsi Hercule destruisoit les monstres dans le berceau : & ses tendres mains qui se laissoient enueloper, estoient assez fortes pour estouffer des serpens venimeux. Ainsi le

seul Alexandre, encore enfant, manioit & remettoit à plaisir ce genereux Bucephal, ce cheual indomté, que tous les Escuyers de son pere n'osoyent approcher. Ceux que la penible vertu nourrit & façonne selon les progresz ordinaires, sont contrains de faire leur apprêrissage avec beaucoup de fatigue, & d'acquérir la science de commander en obeissant. L'heur de ce grand Romain, qui disoit n'auoir esté à la guerre que sous soy-mesme, est vn rare chef-d'œuvre de nature. Mais il faut aduoüer que les Princes ont quelque prerogatiue sur les autres. Les grâdes vertus naissent avec eux : & (comme vn ancien disoit) le soleil ne les voit point plus tost hommes que Roys ou Gouverneurs. C'est pourquoy Pindare parlant des enfans de Pelops, seigneur d'une partie de la Grece, dit que sa femme luy enfanta *λαργίας ἐξ* six Guide-peuples: leur attribuant fort proprement ce nom dès le iour de leur natiuité, par ce qu'ils estoient enfans de Roy. S'il estoit donc besoin de toucher les raisons qui ont meu le Roy de commettre ce Gouvernement à monsieur le Prince, il suffiroit de dire qu'en sa ieunesse il a eu assez de sujet de l'honorer de ceste charge, puis qu'il est le pre-

mier Prince de s^{on} sang. C'est en vn seul mot le combler d'honneur & de merite en luy donnant ce tiltre eminent. Car comme disoit le Roy Porus, le nom de Royal comprend tout ce qui est de grād & d'excellent entre les hommes. Je n'en diray donc que ce seul mot, & ne me hazarderay point d'entrer en la louange de sa maison, parce que ie n'y puis atteindre que du penser, ny l'honorer dignement que par mon silence. Ceux qui entroient dans le lieu où l'Empereur Auguste estoit nay, se trouuoient saisis d'une soudaine horreur s'ils n'y alloient reuerēment: Je craindroy le mesme danger, si ie touchoy ceste corde mal à propos. Il n'estoit permis qu'à Lyfippus de tailler l'image d'Alexādre: Cest ouurage est sans cōparaison plus grand & plus difficile, où chacū n'a pas loy de mettre la main. Je ne toucheray point aussi son origine maternelle, bien que la noblesse du sang de la Trimoille m'en peut fournir vn riche discours: & que la valeur d'Audebert, d'Imbaut, de Guillaume, de Loys de la Trimoille, & de tāt de valeureux seigneurs qui de pere en fils ont tenu ceste maison depuis quatre cens ans & plus, merite bien cest honneur. Mais pour dire vray, la splendeur

de ceste famille est icy obscurcie par vne plus grande clairté qui se reflechit sur elle. Et tout ainsi que les riuieres qui se deschargent dans la mer ne l'accroissent point, mais au contraire à l'abord elles s'enflent grandement par son reflux: Ainsi madame Charlotte Catherine de la Trimouille estant entree en la maison de Bourbon, qui est vne mer de noblesse, elle a communiqué l'honneur de ceste alliance à la sienne, qui n'eust iamais plus grand heur que d'attoucher de si pres vn premier Prince du sang. On dit qu'une dame Romaine monstroït plusieurs bagues & pierreries de grand prix à Cornelia mere des Gracchus, l'invitant de luy faire voir son cabinet: sur quoy elle dissimula iusques à ce que ses deux fils reuindrent des exercices: & alors, Voila (dit-elle) mes pierreries: L'esperance de mes enfans m'est vne plus belle parure, que tout ce que vous m'avez monstré. Le subiet que nous traictons, nous invite assez de dire quelque chose à l'honneur de ceste Princeesse, & de la parer des antiques ornemens de sa noblesse: mais elle ne pense point que la gloire de nos predecesseurs soit vraiment nostre, & ne veut rien emprunter: elle mesprise encore toutes les vanitez

qui rauissent les yeux & l'esprit des femmes. Monsieur son fils est son seul ornement & son plaisir, il luy tient lieu d'un grand & riche diamant qu'elle prend peine de polir, & d'embellir d'une plus rare beauté, à fin de le rendre de plus en plus agreable au Roy, & utile à ceste courōne, qui est la fin de son desir. Mais en ce soin qu'elle prend de luy, quel plaisir ce luy est de voir profiter à l'œil ceste ieune plante, qui se trouuāt en vne terre fertile pousse aussi tost du fruiēt que de la fleur? Vous ne voyez rien de puerile en luy que le visage, ses paroles sont desia viriles, sa contenance graue, son iugement meur: ce qui est neantmoins assaisonné d'une admirable douceur. De sorte que nous luy pouuons iustement attribuer l'eloge qu'un ancien auteur donnoit au ieune Gordien, lequel il disoit estre beau, aimable, agreable, sage & aduisé, & tellement accomply que l'âge seul defailloit à sa iuste grandeur. On escrit que les Ambassadeurs du Roy de Perse estās venus en la Cour de Philippes de Macedoine y trouuerent Alexandre lors ieune, qui les recueillit en l'absence de son pere: & ne les entretint pas des propos de son âge, mais leur feit des sages responses, & leur proposa
des

des questions d'un iugement si solide, qu'il les rait en admiration. Monsieur le Prince rend ordinairement un pareil tesmoignage de luy : car toutes ses actions sont desja si ferieuses, que comme on disoit de l'Empereur Valerian qu'il estoit Censeur des sa ieunesse, on peut dire de cestuy-cy que des son enfance il est Capitaine, & capable de tout ce qu'il plaira au Roy luy commander.

Mais & recognoissons maintenant cōbien la prouidence de Dieu l'assiste visiblement: Ceste belle monstre de vertu estoit en danger de croupir en terre, si elle n'eust trouué de l'appuy pour se hausser : aussi ne luy a-il point manqué, & en cela nous iugeons qu'il y a du mystere en sa fortune, & que Dieu l'a reserué pour sen seruir. Tout le monde a veu qu'il l'a preserué de mille perils, qui le menaçoient des le iour de sa naissance, qu'il l'a couuert del'ombre de son aile, qu'il l'a conduit par la main au trauers de tant de difficultez, pour le consigner entre les bras du Roy, comme en un port bien assuré. Les fables disent que Hercule estoit fils de Iupiter, mais que ce nonobstant il n'eust point esté deifié, sil n'eust succé du lait de Iunon (c'est la deesse des honneurs.)

Nous pouuons dire hardiment qu'encore que ce Prince soit issu de si grād lieu, si n'eust il que bien difficilement surmonté les malignes oppositions de son horoscope, si le benin aspect du Roy ne luy eust esté favorable, & si il ne luy eust faict succer ce laict d'honneur, comme il a si liberalemēt, qu'il a voulu mōstrer que sa bien-vueillance estoit toute publique, en ce qu'il declare par les lettres de ce Gouuernement qu'il l'appelle à ceste charge après luy, cōme ayant vn grand intérêt à la conseruation de cest Estat. Il y auoit des fontaines en Perse, dont nul ne beuuoit que le Roy & son fils aîné : ainsi sa Majesté tesmoigne que depuis que Dieu l'a appelé à l'administration del'Estat, il a tousiours gardé ce Gouuernemēt, duquel il estoit pourueu auparauant son aduenement à la Couronne, en intention de le bailler à monsieur le Prince, comme premier Prince de son sang : voulant monstre que ce seul degré le rend capable de cest honneur, qu'il n'a voulu communiquer à autre qu'à luy. Aimoinus historien François escrit, que quandvn Roy de France embrasse quelcun, cest vn presage de sa future grandeur : Que deuons-nous donc esperer de ce Prince que

le Roy a si doucement embrassé, si benigne-
ment recueilly, qu'il luy a donné tout à la
fois les marques de grandeur que les Empe-
reurs Romains attribuoient à celuy qui leur
estoit le plus proche? Car pour son premier
degré ils le declaroient Prince de la ieunes-
se, & apres, luy donnoient le tiltre qui s'ap-
pelle *Nobilissimatus*, qui conuenoit à luy
seul, comme estant eleué de plusieurs de-
grez de noblesse par dessus les autres Prin-
ces. Le Roy faict icy l'un & l'autre, car il hon-
nore monsieur le Prince du tiltre de premier
Prince du sang, qui est proprement ceste su-
preme noblesse: & au lieu de celuy de Prin-
ce de la ieunesse qui estoit imaginaire, il le
charge d'un Gouuernement qui est encore
tout reluisant de la gloire de ses vertus.

Si nous considerons toutes les circonstan-
ces de ceste gratification, nous y trouue-
rons vn rapport excellent. Le Duché de
Guyenne, selon qu'il est auiourdhuy com-
posé, fut erigé par saint Loys, tige de la mai-
son de Bourbon. Il comprend vne grande
partie de l'Aquitaine, & de ce que lon appel-
loit *Tractus Aremoricus*; s'estendant des Py-
renees iusques à l'emboucheure de Loire.
Ceste coste Xaintôgeoise a esté la premiere

prouince de toutes les Gaules qui s'est mise en l'obeissance des François, si nous en croyons Zozime graue historien, qui peut estre soustenu de l'autorité de la notice de l'Empire d'Occident, où il se lit que lors que les Gaules estoient encores Romaines, il y auoit vne garnison de François en ces marches, lesquels vray-semblablement prindrent l'occasion de se rendre maistres de ceste prouince où ils auoient commandement, lors qu'ils y trouuerent les peuples disposez par la faineantise des Romains, & les incursions continuelles des barbares. Tellement qu'il est bien seant que ce Duché premierement érigé par saint Loys, & qui le premier a esté François, soit gouuerné par le premier Prince du sang, comme par vn priuilege particulier.

L'honneur de ceste charge est donc bien grand, soit que lon considere la qualité de celuy qui le donne, soit l'excellence du present, mais il porte aussi quant & soy beaucoup de sollicitude. Les grands offices ne sont rien que ceps & liens dorez: plus vn Prince a de pouuoir, moins il est à soy-mesme. Il faut que monsieur le Prince captiue la liberté de sa ieunesse sous le joug de son

deuoir, à fin de s'acquiter dignement de la charge que le Roy luy donne. Il faut qu'il se consacre entierement à son seruice, & qu'il ne cherche point d'autre plaisir que de meriter ses bonnes graces, en respondant à l'attente qu'il a de luy. Philostrate en la vie d'Apollonius escrit, que les Bracmanes auoient accoustumé de negliger le plus proche du sang de leur Roy, à fin (ce disoient-ils) qu'il apprist à estre souple & modeste, qui est vne chose bien difficile à enseigner aux grands. Sa Majesté a bien sceu choisir vn moyen plus propre pour humilier & s'assujettir le premier Prince de son sang, c'est de l'agrandir & l'eleuer en dignité: Car il l'oblige en ce faisant de n'auoir autre vouloir que le sien, & de n'estre que ce qu'il luy plaist, puis que c'est estre si grand. Ceux qui sont aupres de luy le nourriront en ceste deuotion, & luy apprendront à imiter ce sage Empereur M. Aurele qui escrit de luy, que l'vn des grands biens que Dieu luy eust faict en sa vie, est de l'auoir rendu obeissant à son predecesseur: à fin que par ceste instruction ce ieune Prince s'accoustume à dresser les yeux de son esprit vers l'astre benin, de l'influence duquel il reçoit tant de biens. Et lors que

l'âge luy aura donné plus de iugement il reconnoitra(que dy-ie?) il le reconnoist de ceste heure, que depuis qu'il est sorty du sein de la nature, il n'a rien eu que la main liberale du Roy n'ait versé sur luy, Que tout ce lustre qui environne sa teste procede de ce grand soleil d'honneur, qui luy communique vn rayon de sa lumiere. Que si l'œil de sa bien-vueillance eclipsoit sur luy, il se sentiroit reduit en vne froide obscurité, où il ne pourroit non plus subsister qu'un rameau separé de sa tige, & priué de son aliment naturel. C'est la seule leçon que Madame sa mere luy enseigne: Ce sont les preceptes de ce sage Phenix, que le Roy luy a choisi, qui ne le nourrit pas de moëlle de lyons, mais du lait de Themis: ne le conduit pas aux escoles d'Athenes où on apprenoit à disputer, mais à celles de Perse où la iustice & l'equité s'enseigne aux enfans: & à celles de Sparte, où on apprend seulement à bien obeir au souuerain magistrat: A fin que comme il plaist au Roy luy faire surpasser tous les autres en grandeur & dignité, il les surpasse aussi en obeissance & fidelité.

Sous l'assurance qu'il donne à la Cour

de viure & mourir en ceste resolution, il la
 supplie humblement d'ordonner qu'il soit
 mis sur le reply de ses Lettres, qu'elles ont
 esté leües, publiees & registrees.

*La Cour ordonne que sur le reply des
 Lettres sera mis, Leües, publiees & regi-
 strees, ouy; & ce consentant le Procureur
 general du Roy. Faict en Parlement le
 dixseptieme Mars M. D. XCVII.*

Signé

VOISIN.



